

22/11/1999

Penduduk Langkawi diingot elak sumpahan

LANGKAWI, Ahad - Penduduk Langkawi diingotkan supaya tidak mudah terpedaya dengan fitnah yang dilemparkan pembangkang bagi mengelak dirundung nasib malang buat kali kedua.

Menteri Besar, Tan Sri Sanusi Junid, berkata mereka sudah lama menderita akibat fitnah yang menimpa Mahsuri sehingga gadis rupawan itu dihukum bunuh dan menyebabkan pulau ini gersang selama tujuh abad lalu.

"Oleh itu, penduduk Langkawi perlu menolak kehadiran pembangkang yang sengaja menabur fitnah supaya nasib malang yang menimpa Mahsuri dan pulau ini tidak berulang.

"Rakyat perlu bangun dan menyatakan bahawa mereka tidak mahu lagi termakan fitnah yang ditabur pembangkang terutama ketika kempen pilihan raya umum sekarang kerana sedar kesan celaka yang pernah dialami," katanya ketika melancarkan Karnival Langkawi di Dataran Lang, malam tadi, sempena Pameran Maritim dan Udara Antarabangsa Langkawi (Lima) 1999 yang akan diadakan mulai 30 November hingga 5 Disember ini.

Sanusi berkata, terdapat aliran baru di kalangan penceramah pembangkang yang memperalatkan agama bukan tujuan mendidik tetapi hanya sekadar hiburan dan bahan ketawa.

Katanya, mereka yang menggunakan pentas agama ini sanggup menyebarkan fitnah dan jika penduduk Langkawi tidak berhati-hati, mereka boleh terpengaruh dan keadaan ini akan merugikan mereka sendiri.

"Penduduk Langkawi seharusnya bersyukur dengan daya usaha Perdana Menteri, Datuk Seri Dr Mahathir yang banyak berjasa sehingga membolehkan pulau ini pesat membangun dan bersaing dengan destinasi pelancongan lain," katanya.

(END)